



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

ესენინი სერგეი ალექსანდრეს ძე



ესენინი სერგეი ალექსანდრეს ძე [21. IX (3. X). 1895, სოფ. კონსტანტინოვო (ახლანდ. ესენინო), რიზანის ოლქი, - 28. XII. 1925, ლენინგრადი, დაკრძალულია მოსკოვში], რუსი პოეტი. 1913-იდან ცხოვრობდა მოსკოვში, ხოლო 1915 დასახლდა პეტროგრადში, სადაც დაუახლოვდა რუს. პოეზიის თვალსაჩინო წარმომადგენლებს: ა. ბლოკს, ა. ბელის, ს. გოროდეცკის, ნ. კლიუევს და სხვ. 1916 გამოვიდა მისი

ლექსების პირველი კრებული, რ-მაც პოეტს დიდი აღიარება მოუტანა. 1919-23 იმაჟინისტების ლიტერატურულ წრეში იყო გაერთიანებული. წინააღმდეგობებით აღსავსე თანადროულობის მისეულმა აღქმამ განაპირობა დეკადენტური მოტივები მის პოეზიაში და წარმოშვა ცხოვრებისადმი პესიმისტური დამოკიდებულება, რაც აისახა პოეტურ ციკლში „სამიკიტნების მოსკოვი“ (1921-24) და პოემაში „შავი ადამიანი“ (1925). მძიმე დეპრესიის გამო პოეტმა სიცოცხლე თვითმკვლელობით დაასრულა. ე-ის ცხოვრებასა და შემოქმედებაში გარკვეული როლი შეასრულა საქართველომ. თბილისსა და ბათუმში გატარებულ თვეებს (1924 სექტ. - 1925 მარტი) პოეტი თავისი ცხოვრების ყველაზე ბედნიერ და ნაყოფიერ ხანად მიიჩნევდა. ე. „მოიხილა“ (მისივე სიტყვით) საქართვე. ბუნებით, ხალხის ხასიათით, ძვ. ტრადიციებით, კულტურით, ხალხ. გეპირსიტყვიერებითა და ლიტერატურით, აგრეთვე - ყოფითი თავისებურებებით. მას სულიერი სიახლოვე აკავშირებდა ქართვ. პოეტებთან - ტ. ტაბიძესა და პ. იაშვილთან, ვ. გაფრინდაშვილსა და გ. ლეონიძესთან, ს. შანშიაშვილთან. საქართველოში შექმნა რუს. პოეზიის შედევრები: „წარმავალი რუსეთი“, „მიუსაფარი რუსეთი“, „წერილი მანდილოსანს“, „კავკასიაში“, „საქართველოს პოეტებს“, „ჩემი გზა“, „წერილი ბაბუას“, „მოგონება“, „დედამინის კაპიტანი“, „სპარსული მოტივების“ მნიშვნელოვანი ნაწილი და სხვა ცნობილი

ნაწარმოებები (სულ ოცდაათამდე); აქვე მუშაობდა „ანა სნეგინაზეც“. ამ პერიოდის ნაწარმოებთა უმეტესი ნაწილი დაიბეჭდა თბილისისა და ბათუმის პრესაში. საქართველოშივე გამოვიდა ე-ის ლექსებისა და პოემების კრებულები რუს. და ქართ. ენებზე. სხვადასხვა დროს ე-ის პოეტურ ნიმუშებს თარგმნიდნენ მ. პატარიძე, გ. ცეცხლაძე, მ. ლებანიძე, ჯ. ინჯია, გ. მარგველაშვილი და სხვ. ე-ის ცხოვრებისა და შემოქმედების შესახებ მნიშვნელოვანი სამეცნ.-კვლევითი და მემუარული ლიტ-რაა შექმნილი, დაწერილია არაერთი სტატია, ნარკვევი და მოგონება. მათ შორის აღსანიშნავია გ. ლეონიძის, ტ. ტაბიძის, ფ. დოლიძის მოგონებები. საქართვ. და ქართვ. ინტელიგენციასთან პოეტის პირადი და შემოქმედებითი ურთიერთობის საკითხებს ეძღვნება ი. ბოგომოლოვის, ვ. ბალუაშვილის, გ. მარგველაშვილის, დ. თუხარელის, ლ. ასათიანის სტატიები.

თბზ.: Собр., соч., т. 1-5, М., 1966-68; ლექსები, ტფ., 1926; ლექსები, პოემები, ბათ., 1969; ლირიკა, ბათ., 1980; ლექსები, პოემა, ბათ., 1984; ლექსები, პოემები, თბ., 1985; ლექსები, თბ., 1985; ანა სნეგინა, თბ., 1970; არყის ხე, თბ., 1973; სპარსული მოტივები, თბ., 1984.

ლიტ.: ბ ე ქ ი რ ი შ ვ ი ლ ი ი., რუსი და სხვა მოძმე ხალხების მწერლები აჭარის შესახებ, ბათ., 1973; ბ ო გ ო მ ო ლ ო ვ ი ი., სერგეი ესენინი საქართველოში, წგ.: დიადი მეგობრობის ფურცლები, თბ., 1983; გ ი გ ო ლ ო ვ ი გ., სერგეი ესენინის პოეზია, წგ.: რუსული ლიტერატურის ისტორია, ტ. 3, თბ., 1963; Б о г о м о л о в И., Сергей Есенин и Грузия, წგ.: Тропую дружбы, Тბ., 1984; Л е о н и д з е Г., Из автобиографии, წგ.: О Маяковском. Дни и встречи, Тბ., 1963; Сергей Есенин в Грузии. Сборник, Тბ., 1986; Т а б и д з е Н., Золотая монета, წგ.: Воспоминания о Сергее Есенине. Сборник, М., 1965; Т а б и д з е Т., С. Есенин в Грузии, წგ.: Статьи, очерки, переписка, Тბ., 1964.

ი. გიგოლოვი
